

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সংবাদ সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৭৪/২০১৭-১৮

ঢাকা, বৃহস্পতিবার ১২ অক্টোবর ২০১৭, ২৭ আশ্বিন ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। স্থানীয় উন্নয়নের পাশাপাশি জাতীয় অগ্রগতি নিশ্চিত করতে রাষ্ট্রপতির আহ্বান
চিকিৎসার নামে ব্যবসা করবেন না : চিকিৎসকদের প্রতি রাষ্ট্রপতি
- ২। বাংলাদেশ '২৪ সালের মধ্যে দারিদ্র্যদূরীকরণে সাফল্য অর্জন করবে : অর্থমন্ত্রী
বাংলাদেশের সামগ্রিক অগ্রগতির প্রশংসা ইউএনডিপি প্রশাসকের
- ৩। রোহিঙ্গা ইস্যুতে এগিয়ে আসতে দাতাসংস্থা ও বিশ্বনেতাদের প্রতি স্পিকারের আহ্বান
- ৪। প্রত্যাবাসন ঠেকাতে পরিকল্পিত হামলা চালাচ্ছে মায়ানমার : জাতিসংঘ প্রতিবেদন
ত্রাণ বিতরণে তিন এনজিও'র ওপর নিষেধাজ্ঞা
- ৫। চাল ও জ্বালানি তেল আমদানির সিদ্ধান্ত : ক্রয়সংক্রান্ত মন্ত্রিসভা কমিটি'র বৈঠক
- ৬। ছয় মাসের মধ্যে দৃশ্যমান হবে মেট্রোরেল : সেতুমন্ত্রী
- ৭। খাদ্য অধিকার আইন জরুরি : তথ্যমন্ত্রী
- ৮। বাংলাদেশের সাত শতাংশ প্রবৃদ্ধির পূর্বাভাস আইএমএফের
- ৯। প্রত্যেক মার্কেট ও শপিংমলকে অগ্নিকাণ্ডের মহড়া করতে হবে : দুর্যোগমন্ত্রী
- ১০। যুদ্ধাপরাধ ট্রাইব্যুনাল পুনর্গঠন : বিচারপতি মো শাহিনুর ইসলাম চেয়ারম্যান
- ১১। সুবিধাবঞ্চিত শিশুদের অংশগ্রহণে শিশু অধিকার সপ্তাহ শুরু

১। স্থানীয় উন্নয়নের পাশাপাশি জাতীয় অগ্রগতি নিশ্চিত করতে রাষ্ট্রপতির আহ্বান

চিকিৎসার নামে ব্যবসা করবেন না : রাষ্ট্রপতি

রাষ্ট্রপতি মোঃ আবদুল হামিদ স্ব-স্ব এলাকার উন্নয়নের পাশাপাশি জাতীয় অগ্রগতির জন্য একসঙ্গে কাজ করতে স্থানীয় নেতা, পেশাজীবী, সাংবাদিক ও সরকারি কর্মকর্তাদের প্রতি আহ্বান জানিয়েছেন। নিজ জেলায় চারদিন সফরের শেষদিনে গতকাল (১১ অক্টোবর বুধবার) কিশোরগঞ্জে স্থানীয় নির্বাচিত প্রতিনিধি, বিভিন্ন পেশাজীবী সংগঠন এবং সাংবাদিকদের সঙ্গে মতবিনিময়কালে রাষ্ট্রপতি বলেন, স্থানীয় উন্নয়নের পাশাপাশি জাতীয় অগ্রগতি নিশ্চিত করতে আপনাদের একসঙ্গে কাজ করতে হবে। একইদিনে কিশোরগঞ্জে রাষ্ট্রপতির সঙ্গে প্রেসিডেন্ট আবদুল হামিদ মেডিকেল কলেজ ও হাসপাতালের চিকিৎসকদের প্রতিনিধিদল সাক্ষাৎ করতে গেলে চিকিৎসার নামে রোগীদের সঙ্গে প্রতারণা না করার জন্য চিকিৎসক ও সংশ্লিষ্ট অন্যদের প্রতি আহ্বান জানিয়েছেন। সূত্র-প্রথম আলো (পৃ.২,ক.৪), জনকণ্ঠ (শেষ পৃ.,ক.৫) নিউজ টুডে (পৃ.২,ক.৫), বাংলাদেশ টুডে (পৃ.২,ক.৫)।

২। বাংলাদেশ '২৪ সালের মধ্যে দারিদ্র্যদূরীকরণে সাফল্য অর্জন করবে : অর্থমন্ত্রী

বাংলাদেশের সামগ্রিক অগ্রগতির প্রশংসা ইউএনডিপি প্রশাসকের

অর্থমন্ত্রী আবুল মাল আবদুল মুহিত বলেছেন, বাংলাদেশ ২০২৪ সালের মধ্যেই দারিদ্র্যদূরীকরণে সাফল্য অর্জন করবে। প্রতিশ্রুতি ও দৃঢ় ইচ্ছাশক্তির মাধ্যমেই বাংলাদেশ এমডিজির মতো এসডিজির লক্ষ্য অর্জন করবে বলে তিনি প্রত্যয় ব্যক্ত করেন। গতকাল (১১ অক্টোবর বুধবার) মার্কিন যুক্তরাষ্ট্রের নিউইয়র্কে 'টেকসই উন্নয়নের পথে অভিযাত্রা : এমডিজির পথ ধরে এসডিজি অর্জন' শীর্ষক আন্তর্জাতিক সেমিনারে অর্থমন্ত্রী এসব কথা বলেন। আন্তর্জাতিক থিঙ্ক ট্যাংক প্রতিষ্ঠান ইনস্টিটিউট ফর পলিসি, এডভোকেসি এন্ড গভর্নেন্স আয়োজিত এ সেমিনারের উদ্বোধন অধিবেশনে বক্তৃতা দেন ইউএনডিপির ব্যুরো অব পলিসি এন্ড প্রোগ্রাম সাপোর্টের সহকারী প্রশাসক ও পরিচালক এবং জাতিসংঘের আন্ডার সেক্রেটারি জেনারেল মাগদি মার্টিনেজ সোলিমান। টেকসই অর্থনৈতিক প্রবৃদ্ধি অর্জনে বাংলাদেশের সাফল্যের কথা তুলে ধরে মার্টিনেজ বলেন, বাংলাদেশ সামগ্রিক অর্থনীতির ব্যবস্থাপনার ক্ষেত্রে একটি নিরবচ্ছিন্ন নীতিমালা প্রণয়ন করতে পেরেছে, যার ফলে দেশটির অর্থনীতির প্রবৃদ্ধি সাম্প্রতিক বছরগুলোতে ধারাবাহিকভাবে ৬ ভাগের উপরে রয়েছে। মানব সম্পদের ব্যাপক উন্নয়ন হয়েছে। পাবলিক সেক্টরে জবাবদিহিতা বৃদ্ধি পেয়েছে। তিনি সরকারের 'ডিজিটাল বাংলাদেশ' ও 'ভিশন ২০২১' এর সাফল্যের কথা উল্লেখ করেন। ১৩ হাজার কমিউনিটি ক্লিনিকে নারী ও শিশুস্বাস্থ্যের উন্নয়নে আইসিটি ব্যবহার করায় তিনি বাংলাদেশের প্রশংসা করেন। সূত্র-সংবাদ (শেষ পৃ.,ক.২), জনকণ্ঠ (পৃ.১,ক.৫), নিউজ টুডে (শেষ পৃ.,ক.৬), নিউ এজ (শেষ পৃ.,ক.১)।

৩। রোহিঙ্গা ইস্যুতে এগিয়ে আসতে দাতা সংস্থা ও বিশ্বনেতাদের প্রতি স্পিকারের আহ্বান

রোহিঙ্গা সংকট সমাধানে দ্রুত ইতিবাচক পদক্ষেপ গ্রহণের জন্য দাতা সংস্থাসহ বিশ্বনেতাদের প্রতি আহ্বান জানিয়েছেন সিপিএ চেয়ারপারসন ও জাতীয় সংসদের স্পিকার ড. শিরীন শারমিন চৌধুরী। গতকাল (১১ অক্টোবর বুধবার) যুক্তরাষ্ট্রের ওয়াশিংটনে বিশ্বব্যাংকের আয়োজনে আইএমএফ-এর সদরদফতরে পার্লামেন্টারি নেটওয়ার্ক ওয়ার্কশপে বক্তব্যকালে তিনি এ আহ্বান জানান। সম্প্রতি মায়ানমারের বলপ্রয়োগে বাস্তুচ্যুত বিপুলসংখ্যক রোহিঙ্গা নাগরিক বাংলাদেশে আশ্রয় নিয়েছে। সম্পূর্ণ মানবিক কারণে তাদের আশ্রয় দেওয়া হয়েছে। এ সংকট সমাধানে তিনি বিশ্বব্যাংকের দৃষ্টি আকর্ষণ করে দ্রুত ইতিবাচক পদক্ষেপ গ্রহণের জন্য দাতা সংস্থাসহ বিশ্ববাসীর প্রতি আহ্বান জানান। সূত্র-সংবাদ (শেষ পৃ.,ক.১), সমকাল (পৃ.২,ক.১), নিউজ টুডে (শেষ পৃ.,ক.২), নিউ নেশন (পৃ.১,ক.১)।

৪। প্রত্যাবাসন ঠেকাতে পরিকল্পিত হামলা চালাচ্ছে মায়ানমার সেনাবাহিনী : জাতিসংঘ প্রতিবেদন

ত্রাণ বিতরণে তিন এনজিও'র ওপর নিষেধাজ্ঞা

মায়ানমারের রাখাইন রাজ্যে সেনা অভিযানে বাংলাদেশে পালিয়ে আসা রোহিঙ্গারা যাতে মায়ানমারে ফিরে যেতে না পারে সেজন্য সুসংগঠিত, সমন্বিত ও পরিকল্পিতভাবে রাখাইনের বিভিন্ন স্থানে হামলা চালাচ্ছে দেশটির সেনাবাহিনী। যেসব স্থানে রোহিঙ্গা পালিয়ে গেছে সেখানে জনশূন্য ঘরবাড়ি আগুন দিয়ে পুড়িয়ে দেওয়া হচ্ছে। এছাড়া বাংলাদেশ-মায়ানমার সীমান্তে মায়ানমার অংশে কাঁটাতারের বেড়া দিয়ে নিরাপত্তা জোরদার করা হচ্ছে। গতকাল (১১ অক্টোবর বুধবার) জাতিসংঘের মানবাধিকার কমিশনের এক প্রতিবেদনে এই তথ্য প্রকাশ পেয়েছে। সূত্র-জনকণ্ঠ (পৃ.১,ক.১), প্রথম আলো (পৃ.১,ক.২), সংবাদ, ডেইলি সান, নিউজ টুডে, নিউ নেশন, অবজারভার এ বিষয়ে লিড নিউজ ছেপেছে।

তিনটি বেসরকারি সংস্থাকে (এনজিও) রোহিঙ্গা শরণার্থীদের মধ্যে ত্রাণকাজ চালাতে নিষেধ করেছে সরকার। এই সংস্থাগুলো ত্রাণ বিতরণের নামে ভিন্ন কিছু করছে বলে অভিযোগ রয়েছে। এনজিওগুলো হলো মুসলিম এইড বাংলাদেশ, ইসলামিক রিলিফ ও আল্লামা ফজলুল্লাহ ফাউন্ডেশন। গতকাল (১১ অক্টোবর বুধবার) সংসদভবনে অনুষ্ঠিত পররাষ্ট্র মন্ত্রণালয় সম্পর্কিত সংসদীয় স্থায়ী কমিটির ১৬তম বৈঠকে মন্ত্রণালয়ের পক্ষ থেকে এসব তথ্য জানানো হয়। সূত্র-সংবাদ (পৃ.১,ক.১), জনকণ্ঠ (পৃ.১,ক.৬), নিউজ টুডে (পৃ.১,ক.৩)।

৫। চাল ও জ্বালানি তেল আমদানির সিদ্ধান্ত : ক্রয়সংক্রান্ত মন্ত্রিসভা কমিটির বৈঠক

মায়ানমার থেকে এক লাখ টন আতপ চাল আমদানি করবে সরকার। টনপ্রতি মূল্য পড়বে ৪৪২ মার্কিন ডলার। এছাড়া ভারত থেকে ৫০ লাখ টন জ্বালানি তেল আমদানি করা হবে। ব্যারেল প্রতি প্রিমিয়াম ধরা হয়েছে ৫ দশমিক ৯২ ডলার। গতকাল (১১ অক্টোবর বুধবার) সচিবালয়ে অনুষ্ঠিত সরকারি ক্রয় সংক্রান্ত মন্ত্রিসভা কমিটির বৈঠকে এ দু'টি প্রস্তাব আনুমোদন দেওয়া হয়েছে। বাণিজ্যমন্ত্রী তোফায়েল আহমেদ বৈঠকে সভাপতিত্ব করেন। সূত্র-যুগান্তর (পৃ.৩,ক.৪), জনকণ্ঠ (শেষ পৃ.,ক.৭), ডেইলি স্টার বিজনেস পাতা (পৃ.১,ক.৬), বাংলাদেশ টুডে (পৃ.১,ক.২)।

৬। ছয় মাসের মধ্যে দৃশ্যমান হবে মেট্রোরেল : সেতুমন্ত্রী

সড়ক পরিবহণ ও সেতুমন্ত্রী ওবায়দুল কাদের বলেছেন, মেট্রোরেল প্রকল্পের কাজ ১২ ভাগ শেষ হয়েছে। আগামী ছয় মাসের মধ্যে দেশের প্রথম মেট্রোরেলের কাজের অগ্রগতি দৃশ্যমান হবে বলে তিনি আশা প্রকাশ করেন। গতকাল (১১ অক্টোবর বুধবার) রাজধানীর উত্তরায় দিয়াবাড়িতে মেট্রোরেলের ডিপো এলাকা পরিদর্শন শেষে তিনি এসব কথা বলেন। সূত্র-সমকাল (পৃ.২,ক.৬), ইত্তেফাক (পৃ.১,ক.১), সংবাদ (পৃ.১,ক.৫)।

৭। খাদ্য অধিকার আইন জরুরি : তথ্যমন্ত্রী

খাদ্য অধিকার আইন প্রণীত হলে রাষ্ট্র প্রতিটি মানুষের ক্ষুধামুক্তি নিশ্চিত করতে বাধ্য থাকবে। সামাজিক বৈষম্য দূর করতে হলে খাদ্য ও পুষ্টি নিরাপত্তা নিশ্চিত করা প্রয়োজন। তাই খাদ্য অধিকার আইন জরুরি। ‘বন্যা ও প্রাকৃতিক দুর্যোগপরবর্তী খাদ্য নিরাপত্তা পরিস্থিতি এবং খাদ্য অধিকার প্রসঙ্গ’ শীর্ষক এক জাতীয় সেমিনারে তথ্যমন্ত্রী হাসানুল হক ইনু এসব কথা বলেন। গতকাল (১১ অক্টোবর বুধবার) রাজধানীর সিরডাপ মিলায়তনে ১৬ অক্টোবর বিশ্ব খাদ্য দিবস উপলক্ষে দেশব্যাপী খাদ্য অধিকার প্রচারাভিযানের অংশ হিসেবে এই সেমিনারের আয়োজন করে। সূত্র-ভোরের কাগজ (পৃ.২,ক.৭), যুগান্তর (পৃ.৩,ক.২), নিউ নেশন (শেষ পৃ.,ক.২), ইন্ডিপেনডেন্ট (পৃ.২,ক.৩)।

৮। বাংলাদেশের সাত শতাংশ প্রবৃদ্ধির পূর্বাভাস আইএমএফের

চলতি ও ২০১৮ সালে এশিয়ার উদীয়মান অর্থনীতির দেশগুলোর মোট দেশজ উৎপাদন (জিডিপি) প্রবৃদ্ধি সাড়ে ৬ শতাংশ হবে। আর বাংলাদেশের প্রবৃদ্ধি ৭ শতাংশ হবে বলে পূর্বাভাস দিয়েছে আন্তর্জাতিক মুদ্রা তহবিল (আইএমএফ)। আইএমএফ-এর ধারণা, চলতি বছর বিশ্ব অর্থনৈতিক প্রবৃদ্ধি হবে ৩ দশমিক ৬ শতাংশ এবং ২০১৮ সালে তা বেড়ে ৩ দশমিক ৭ শতাংশে দাঁড়াবে। গতকাল (১১ অক্টোবর বুধবার) আইএমএফ প্রকাশিত ‘ওয়ার্ল্ড ইকোনমিক আউটলুক ২০১৭’-এর সর্বশেষ সংস্করণে এ তথ্য তুলে ধরা হয়। সূত্র-সংবাদ (শেষ পৃ.,ক.৩), সমকাল (পৃ.১,ক.৪), বণিক বার্তা (শেষ পৃ.,ক.১)।

৯। প্রত্যেক মার্কেট ও শপিংমলকে অগ্নিকাণ্ডের মহড়া করতে হবে : দুর্যোগমন্ত্রী

দুর্যোগ ব্যবস্থাপনা ও ত্রাণমন্ত্রী মোফাজ্জল হোসেন চৌধুরী মায়া, বীরবিক্রম, এমপি বলেছেন, প্রত্যেক মার্কেট ও শপিংমলকে অগ্নিকাণ্ড মহড়া করতে হবে। গতকাল (১১ অক্টোবর বুধবার) রাজধানীর বসুন্ধরা সিটি কমপ্লেক্সে ভূমিকম্প ও অগ্নিকাণ্ড সচেতনতা মহড়া শেষে দুর্যোগ ব্যবস্থাপনা ও ত্রাণমন্ত্রী বলেছেন, অগ্নিকাণ্ডের ক্ষয়ক্ষতি ও ঝুঁকি এড়াতে প্রত্যেক মার্কেট ও শপিংমলকে নিয়মিত ভূমিকম্প ও অগ্নিকাণ্ড মহড়া করতে হবে। এ কাজে ফায়ার সার্ভিস ও সিভিল ডিফেন্স ডিপার্টমেন্ট প্রয়োজনীয় সহযোগিতা করবে। অসচেতনতায় যাতে মানুষের জীবন বিপন্ন না হয় সেজন্য সবাইকে আন্তরিক হতে হবে। সূত্র-ভোরের কাগজ (পৃ.১,ক.১), ইনকিলাব (শেষ পৃ.,ক.৫), ইন্ডিপেন্ডেন্ট (পৃ.২,ক.৩), ডেইলি সান (পৃ.১,ক.১)।

১০। যুদ্ধাপরাধ ট্রাইব্যুনাল পুনর্গঠন : বিচারপতি মো শাহিনুর ইসলাম চেয়ারম্যান

পুনর্গঠন করা হয়েছে যুদ্ধাপরাধ ট্রাইব্যুনাল-১। চেয়ারম্যান ও দু'জন সদস্য নিয়োগের মধ্য দিয়ে এই ট্রাইব্যুনাল পুনর্গঠন করল সরকার। পুনর্গঠন আদেশ অনুযায়ী বিচারপতি মো শাহিনুর ইসলামকে চেয়ারম্যান হিসেবে নিয়োগ দেওয়া হয়েছে। এর আগে তিনি ট্রাইব্যুনালের সদস্য হিসেবে দায়িত্ব পালন করছিলেন। এছাড়া হাইকোর্টের বিচারক বিচারপতি আমির হোসেন ও অবসরপ্রাপ্ত জেলা জজ মো আবু আহমেদ জমাদারকে সদস্য হিসাবে নিয়োগ দেওয়া হয়েছে। গতকাল (১১ অক্টোবর বুধবার) আইন মন্ত্রণালয়ের এক প্রজ্ঞাপনে এ তথ্য জানানো হয়। সূত্র-ভোরের কাগজ (পৃ.১,ক.১), ইনকিলাব (শেষ পৃ.,ক.৫) ইন্ডিপেন্ডেন্ট (পৃ.২,ক.৩), ডেইলি সান (পৃ.৩,ক.৫)।

১১। সুবিধাবঞ্চিত শিশুদের অংশগ্রহণে শিশু অধিকার সপ্তাহ শুরু

সুবিধাবঞ্চিত পথ শিশুদের অংশগ্রহণে নানা অনুষ্ঠানের মধ্য দিয়ে শুরু হলো 'শিশু অধিকার সপ্তাহ ২০১৭'। গতকাল (১১ অক্টোবর বুধবার) ঢাকা বিশ্ববিদ্যালয়ের জগন্নাথ হল মাঠে সপ্তাহব্যাপী এই আয়োজন উদ্বোধন করেন মহিলা ও শিশুবিষয়ক প্রতিমন্ত্রী মেহের আফরোজ চুমকি। 'শিশু পেলে অধিকার, খুলবে নতুন বিশ্বদ্বার' স্লোগানকে সামনে রেখে সকল শিশুর অধিকার ও নিরাপত্তা নিশ্চিতের প্রত্যয়ে নেওয়া হয়েছে বিভিন্ন কর্মসূচি। সূত্র-সংবাদ (শেষ পৃ.,ক.১), জনকণ্ঠ (পৃ.৩,ক.১), নিউজ টুডে (পৃ.৩,ক.৪), বাংলাদেশ টুডে (শেষ পৃ.,ক.৪)।

সম্পাদকীয়

- ক. ভোরের কাগজ : চট্টগ্রামের সীতাকুণ্ডে একটি ইস্পাত কারখানায় তরল লোহার ট্যাংক বিস্ফোরণে ১১ শ্রমিক দহন হওয়ায় উদ্বেগ প্রকাশ করে এবং শিল্প-কারখানার নিরাপত্তা ব্যবস্থা বিষয়ে মালিক ও শ্রমিকদের সচেতন হওয়ার আহ্বান।
- খ. জনকণ্ঠ, সংবাদ, নিউ নেশন : ব্লু হোয়েল গেমটি যেন বাংলাদেশে ডাউনলোড করতে না পারে সে ব্যাপারে সরকারের পক্ষ থেকে বিটিআরসিকে নির্দেশনা, মানুষের চিন্তা ও মননে নেতিবাচক প্রভাব ফেলে এমন আরও অনেক গেম ও অ্যাপস আছে এগুলোর ব্যাপারেও নজর রাখতে সচেতন হওয়ার আহ্বান।
- গ. সমকাল : রাজধানীতে ছিনতাইসহ সামাজিক অপরাধ বৃদ্ধি পাওয়ায় উদ্বেগ প্রকাশ করে যেকোনো মূল্যে জননিরাপত্তা নিশ্চিত করার ওপর গুরুত্বারোপ।
- ঘ. জনকণ্ঠ : সামাজিক নিরাপত্তার অন্যতম খাত সঞ্চয়পত্রের অর্থ বেশি করে বিনিয়োগ করার সুপারিশ।
- ঙ. প্রথম আলো : যানবাহনে এখনও ব্যবহৃত নিষিদ্ধ ঘোষিত হাইড্রোলিক হর্ন এর বিরুদ্ধে কঠোর ব্যবস্থা নেওয়ার দাবি।
- চ. ইন্ডিপেন্ডেন্ট : দেশে মাদকাসক্তের সংখ্যা বৃদ্ধি পাওয়ায় উদ্বেগ প্রকাশ করে মাদক ডিলার, পাচারকারী ও মদদদাতাদের বিরুদ্ধে কঠোর আইনি পদক্ষেপ নেওয়ার সুপারিশ।

- ছ. নিউজ টুডে : নিত্যপ্রয়োজনীয় পণ্যসামগ্রীর মূল্যবৃদ্ধিতে পণ্যমূল্য নিয়ন্ত্রণে সরকারকে যথযথ পদক্ষেপ নেওয়ার সুপারিশ।
- জ. নিউজ এজ : শিশুদের অপুষ্টি দূরীকরণে খাদ্যমান নিয়ন্ত্রণের পাশাপাশি স্বাস্থ্য ও পুষ্টিতে সরকারি বরাদ্দ বাড়ানোর ওপর গুরুত্বারোপ করে সম্পাদকীয় প্রকাশ।

উপ-সম্পাদকীয়

যায়যায়দিন পত্রিকায় প্রকাশিত কলামে উল্লেখ করা হয়েছে, নিত্যপ্রয়োজনীয় পণ্যের মূল্য জনগণের ক্রয়ক্ষমতার মধ্যে রাখতে হবে।

নিবন্ধ ও ফিচার

ইনকিলাব পত্রিকায় প্রকাশিত 'শিশুদের অধিকার নিশ্চিত করতে হবে' শিরোনামের নিবন্ধে শিশুদের প্রতি

আমাদের দায়িত্ব ও কর্তব্য অনেক, তাদের প্রকৃত মানুষ হিসেবে গড়ে তুলতে আমাদের সবার সচেতন হওয়া জরুরি উল্লেখ করে অভিমত প্রকাশ।

#

খাদীজা/মরজিনা/সাইদা/রশীদ/২০১৭/৯.০০

